



COMUNU DE CABUDERRA

Tzitadi Metropolitana de Casteddu

STATUTU DE SA CONSULTA LOCALI PO S' AVALORAMENTU DE SA CULTURA E DE SA LÌNGUA SARDA

Aprovau cun deliberatzioni de su Consillu Comunali n. 25 de su 24/03/2003

Mudau cun deliberatzioni de su Consillu Comunali n. 73 de su 24/11/2011

Mudau cun deliberatzioni de su Consillu Comunali n. 30 de su 14/05/2015



ART. 1

Istituzioni e sedi

1. Biu s' art. 8 c.1 de sa L.R. de su 15 de su mesi de ladàmini 1997, n. 26 est istituida sa Consulta po s' avaloramentu de sa cultura e de sa lingua sarda de su Comunu de Cabuderra;
2. Sa sedi de sa Consulta est in is localis de su Comunu.

ART. 2

Tareas

1. Sa faina prus de importu de sa Consulta est sa de pigai iniziativais po favoressi sa connoscèntzia e s' avaloramentu de sa cultura e de sa lingua sarda, po su prus sa fueddada de bidda, su Cabuderresu, aici puru de presentai considerus e propostas a s' Assessorau Regionali de s' Istruzioni Pùblica, Benis Culturalis, Informatzioni, Spetàculu e Sport, e finas programmas de atividades;
2. In prus sa Consulta si proponit:
 - a) de punnai, in su territòriu de Cabuderra, a su bilinguismu perfetu, traballendi po su diritu a s' imperu, in unu logu determinau, de duas linguas in cunditionis de paridadi, po permiti oportunitadis paris po totu is tzitadinus, cali si siat sa lingua de bartzolu insoru;
 - b) de traballai po spainai e fai connosci sa lingua sarda, sa stòria e is tradizionis de su logu in is scolas de su territòriu de su Comunu de Cabuderra;
 - c) de s' assotziai, in s' in casu, finas cun is Consultas de àterus Comunas;
 - d) de favoressi sa partecipazioni de totu is organismus o assòtzius consideraus comenti espressada de sa cultura locali, po su prus in su setori de sa lingua sarda, chi traballant in su territòriu comunali;
 - e) de promovi sa collaborazioni e su cuncàmbiu de esperièntzias in contu de lingua e cultura sarda intra de àterus comunus de Sardìnnia, aici puru foras de Sardìnnia, prus a prestu innui funt presentis comunidadi sardas o de origini sarda.

ART.3

Funtzionis

Cunforma a is obietivus cosa sua sa Consulta promovit:

1. seminàrius, atòbius e arraxonamentus apitzus de chistionis chi pertocant sa lingua e sa cultura sarda, s' avaloramentu de is tradizionis e sa stòria de su territòriu;
2. censimentus de is benis culturalis presentis in su territòriu;
3. s' arregorta, s' ordinamentu, s' anàlisi de is piessinnus de sa realidadi culturali de su territòriu;
4. sa circa e s' arregorta de s' arricchesa de cultura populari e de tradizionis oralis de su territòriu;
5. s' achirimentu e s' allogamentu de ogetus e de ainas de sa tradizioni de vida e de traballu de sa populazioni cabuderresa, comenti: repertus naturalisticus, benis bibliogràficus, arregortas de ogetus de arti e de artesanìa, arregortas de strumentus musicalis, arregortas de ogetus e de ainas de traballu e àteru;



6. s' organizzazioni de cuncursus e prèmios po scritus in prosa, poesia e po cantus in lingua sarda po sa mùsica, sa sagìstica e sa circa scientifica in Sardìnnia, pruschetotu po s' aprofundimentu de is baloris culturalis de su pòpulu sardu;
7. s' organizzazioni de manifestazzionis chi punnint a spainai sa connoscèntzia de s' ìsula e de sa tziviltadi sarda, in totu is espressadas suas, prus a prestu in su setori linguìsticu, materiali e spirituali;
8. publicazzionis chi pertocant s' ogetu de is indàginis e duncas finas testus audiovisivus in lingua sarda o, comuncas, asuba de sa cultura de s' ìsula;
9. s' aprontadura e sa cumpridura de progetus de circa e de sperimentazzioni in is setoris de sa mùsica, de su teatru e de is artis vivas chi punnint a raportus intra de cultura sarda e àteras culturas;
10. sa circa, su recùperu, sa trascritzioni, sa catalogazzioni e su spainamentu de documentus chi s' agatant in is archìvius foras de Stadu, cun riferimentus a sa stòria sarda.

ART.4

Cumpositzioni

1. Sa Consulta est cumposta de su Sindigu, de s' Assessori a sa Lingua Sarda e de ses espertus de su setori, cualificaus, o finas de personis interessadas a s' avaloramentu de is benis culturalis e, comuncas, relatadas a sa Comunità Cabuderresa, e de unu nùmeru de Consilleris Comunalis paris a su chi si previdit po is Cumissionis Consiliaris permanentis, in sa legislatzioni in vigèntzia, cunforma a is modalidadis previdias po custas Cumissionis;
2. Su presidenti de sa Consulta est su Sindigu e, in s'in casu de ausèntzia sua, est s' Assessori a sa Lingua Sarda, in s'in casu de ausèntzia de ambaduu, est su Visu Presidenti. Su Visu Presidenti de sa Consulta est unu Consilleri Comunali, cumponenti de sa Consulta etotu, eligiu in sa primu setziada utilosa;
3. In cada setziada su presidenti nòminat unu segretàriu verbalizadori, sceberau intre is cumponentis presentis.

ART. 5

Dura

1. Sa Consulta durat in càrriga cantu su Consillu Comunali e, comuncas, fintzas a candu si torrat a annoai.

Art. 6

Cunvocatzioni

1. Sa Consulta s' atòbbiat:
 - a) a manera ordinària dònna tres mesis, chi est possìbili;
 - b) a manera straordinària candu ddu pedit su Presidenti o duas partis de tres de is chi cumponint sa Consulta.
2. Sa Consulta si cunvocat cun avisu scritu, inditendi sa dii, s' ora, su logu de adunàntzia e su puntu in s'agenda de is traballus po sa dii. S' avisu s' imbiat a is cumponentis de sa Consulta cun sistema de comunicazzioni telemàticu, a su mancu duas diis innantis de sa dii stabilida po sa setziada, sarvu situazzionis straordinàrias o de urgèntzia, candu sa Consulta s' at a podi cunvocai in cali si siat momentu cun avisu chi si podit intregai e/o imbiai in is maneras prus oportunas sèmpiri chi totu is cumponentis ndi siant informaus.



3. Is detzisionis si pigant cun sa majoria de is votus.
4. Sa setziada balit candu est presenti sa metadi prus unu de is cumponentis.
5. Is cumponentis cun tres ausèntzias de s'ghida sena de giustificatzioni decadint de s'incàrrigu.
6. De cada setziada de sa Consulta su segretàriu ndi sterrit unu verbali, de torrai a intregai a s' Ufitziu de Segreteria Generali e a s' Ufitziu de sa Lìngua Sarda de su Comunu de Cabuderra.

ART. 7

Gastus a càrrigu de su Comunu

Est a càrrigu de su Comunu sa cuota de is gastus chi abarrat foras de is contributus regionalis chi pertocat sa costituzioni e su funtzionamentu de sa Consulta e po sa cumpridura de is programas cunforma a su chi previdit su bilàntziu.

ART. 8

Gastus a càrrigu de su Comunu

Sa Consulta, gràtzias a s' Ufitziu de sa Lìngua Sarda de su Comunu de Cabuderra at a tradusi in lingua sarda custu Statutu.